



Ko teia i raro nei te karere a te Kumiti Akaaere tei orongaia e te Tekeretere Maata ki te katoatoa tei tae ki te akakoroanga o te akamaaraanga i te ra taeanga Evangelia tei raveia ki Takamoa, Rarotonga, i te Ruirua 26 Okotopa. The below is the message by the CICCC Executive Council presented by the General Secretary on the occasion of the Gospel Day commemoration at Takamoa, Rarotonga, on Tuesday 26 October 2021.

1. Akatomoanga/akaaraveianga

Teia te reo o te Tata Salamo, *Ko te ra teia i akonoia e Iehova, ka rekareka tatou e ka perepererekavana i te reira ra* (Salamo 118.24). Kia orana te katoatoa tei matuapuru mai ki teia taokotaianga tapu e te puapinga maata, kia akameitakiia te Atua.

Kotou to te ENUA i teia ra, ui ariki, ui mataiapo, ui rangatira, te oki nei te manako e te maaraara i to kotou au ui tupuna, ratou tei mou mai i teia Evangelia tapu e 200 mataiti i topa ake nei tei tae mai ki to tatou basileia, e 198 mataiti i teiane ki Rarotonga nei, i te akatupuanga i te inangaro o to tatou Atua tei akakite ki tana au pipi; *E teiane, ka aere kotou e akariro i to te pa enua katoa ei pipi; ka bapetizo atu ei ia ratou i te ingoa o te Metua, e no te Tamaiti, e no te Vaerua Tapu; Ma te apii atu ia ratou kia akono i te au mea katoa taku i akaue atu kia kotou; e i na, tei vaitata ua ra au ia kotou, e tae uatu ki te openga o teiane ao* (Mataio 28.19,20). Aroa takake kia koe e Makea ko koe tei akatuera i toou ngutupa ma te karapii-kore kia tuku te Evangelia i tona tango e te tutau ki runga i teiane paepae, kare aite toou takinga-meitaki i te Evangelia, kia akameitakiia te mana katoatoa.

To te TURE, kia akameitaki katoaia koe. Ratou tei akarangatiraia i nga tua e rua, kavamani e to te tua patoi, tei takai ia Araura i teia ra no te akakoroanga maata e raveia maira ki reira, e pera kotou katoatoa e apai nei i te au tuanga tuketuke i te pae o te ture i rotopu i teia taokotaianga i teia ra, kia orana rava i te ingoa maanaana o to tatou Metua Atua i te ao. Kia akameitakiia koe no taau tuanga i rave mai i te au mataiti i topa i te turuanga e te akamatutuanga i te turanga o te Evangelia i roto nei i to tatou basileia, i te au tuanga tei raveia mai e koe. Te au ture tei akamanaia e te Paramani tei riro i te tauturu i tetai au apainga a te Evangelia mei te ture o te ra Sabati e te vai atura, te au akanoonoanga a te ture i roto i tona au mangamanga koia te au tipatimani i raro i tana akateretereanga tei riro katoa i te turu i te au tuanga tuketuke i roto i te Evangelia, te oronga atu nei te kopapa akatere o te Akonoanga Metua i tana akameitakianga maata kia koe, kia manuia no te au ra ki mua.

Te openga iora, kia koe e te EVANGELIA, tei maata e tae rava atu ki tei iti, tatou i roto i te Akonoanga Metua, ratou mei roto mai i nga akonoanga tuketuke i runga i te enua, ratou tei atea atu ki Araura i teia tuatau, tatou katoatoa tei matuapuru mai no teia ra maata o te

Evangelia e to te basileia katoa, kia akameitakiia te Atua. Mei ta Paraleipomeno i akakite mai, *E akapaapaa ia Iehova, e meitaki oki tona, e tu oki tona aroa e rimua* (1 Para.16.34).

No reira kia angaanga kapiti uatu rai tatou, to te ENUA, TURE, e pera te EVANGELIA, no te meitaki o to tatou basileia e te iti tangata i te au ra ki mua.

2. Mei nanai ki teia ra

Te rekareka nei au i te apai mai i teia karere ki rotopu i teia taokotaianga mei roto mai i te Orometua Ngateitei e te au mema katoatoa i runga i te Kumiti Akaaere, tei aru atu iaia ki Araura, tei konei tetai pae, tei Nutireni no te apikepiki maki koia te tiemani o te Rarotonga Konitara Ekalesia, e pera aia i roto i te quarantine i teia ra koia te tavini o te Atua no te Ekalesia Puaikura. Ko teia ta te kumiti i anoano kia oora atu ki mua i teia taokotaianga tapu, no reira kia tika rava ariki mai.

Mei roto mai i te kaveinga tei akonoia no tatou i teia ra, ta te Tauturu Tiemani o te Rarotonga Konitara Ekalesia ka akarava mai i te akamaramaanga i muri ake iaku, 1 Samuela 17.16: *“Kua akavaitata maira aua Philiseti ra i te popongi e te aiai i te akakite anga iaia uaorai, e rua takau akera ra.”* Mei roto mai i te Good News Bible, *“Goliath challenged the Israelites every morning and evening for 40 days.”*

Te akakite ra ki roto i tena irava, e 40 ra tei timataia me kore challenge ia to Iseraela, tena kua ngoie ua ia tatou i te kite i te katoa'anga o te tua o Golia raua ko Davida e tona taopenga'anga. Tatou i roto i te Evangelia, tatou tika'i te Akonoanga Metua, kua timata katoaia teia Evangelia mei te ra i takai mai ei aia ki to tatou basileia i te mataiti 1821 e tae rava mai ki teia ra. E 200 mataiti i tona timataangaia, e 198 mataiti i Rarotonga nei. Eaa taua au timataanga ra? Te au tamanamanataanga tuketuke i te au tavini o te Atua ia ratou e rave ra i ta ratou angaanga, pekapeka i roto i te au Ekalesia, tetai au Ekalesia kua ngaangaa, tetai au mema kua akaruke mai, aere ki vao e oti oki mai i te timata mai ia tatou e noo marie ua nei, tetai au akonoanga tuketuke tei tae mai e to ratou au irinakianga kare i aite ki to tatou, e te vai atura te au timataanga tuketuke. Kia akameitakiia ra te Atua, noatu te au timataanga e manganui, kare rava teianei Evangelia tapu a Iesu Mesia i topa ki raro. Kua apai ra aia i taua au timataanga ra e kua taangaanga kia riro mai ei meitaki no tana Evangelia i te au ra i topa e tae rava mai ki teia ra.

3. Kiea apopo

Ka ui ireira te uianga e, 200 mataiti – me kore 198 mataiti i teianei i Rarotonga nei – kiea te kaveinga o teia pai apopo, apopo atu? Ko te reira te timataanga me kore challenge ka apai tatou ki runga i to tatou au pakuivi i te au ra ka aereia ki mua. Kua autu ratou tei apai mai i te Evangelia e tae mai ki teia ra, ka akapeea ireira tatou i teia ra e kotou apopo i te akarukeanga iaia kia topa ki raro, ngaro uatu ma te kore rava e kitea akaouia mai? Ka akapeea tatou i te akamaramaanga kia ratou tei ngaro e, ko teia te tumuanga i akaruke ei tatou i teianei Evangelia kia ngaro takiri mei runga i te tu o te enua? Auraka rava ia i na Paulo ei, ka utuutu e ka mou uatu tatou iaia i teia ra e kotou apopo e tae uatu ki te openga o teianei ao. No reira ko tena te kapikianga, te apainga, te challenge, te patianganga akaaka, te timataanga, kia aku, kia

koe, kia tatou katoatoa. Utuutuia teiane i Evangelia, akaperepereia, akaepaepaia, tatakinaia ki runga, tapekaia ki te vivi, no te mea mei ta te tata Ebera i akapapu mai, *Ko to tatou ia tutau no te vaerua, e mea mautikore e te mou meitaki, no te mea kua akamouia i te ngai i roto mai i te paruru ra. Ka akara ana ki te mato i paoia mai ei kotou na i na Isaia ei, e ki te tipoko i te vaarua i koia mai ei kotou.*

Kia orana e kia manuia rava te akakoroanga o teia ra, 200 mataiti ki to tatou basileia, 198 ki Rarotonga nei, tapapa atu ei tatou ki te matatiti 2023 no te 200 anga o te mataiti ki Rarotonga nei e pera ki Nga-Pu-Toru.

Ko te Atua te aroa.

Nga Mataio, Tekeretere Maata

No te Kumiti Akaaere

26 Okotopa 2021, Takamoa, Rarotonga



CICC Executive Committee

Front (L-R): Tangi Tereapii (Treasurer), Makirere Poila (Representative for Northern Islands Ekalesias), Rev. Tuaine Ngametua (President), Nga Mataio (Secretary General), Junior Ngatokorua (Legal Adviser)

Rear (L-R): Rev. Tere Marsters (Takamoa Theological College Principal), Rev. Panu Rouru (Representative for Southern Islands Ekalesias), Rev. Oirua Rasmussen (Representative for New Zealand Ekalesias), Rev. Vaka Ngaro (Representative for Rarotonga CICC Council), Mona Ioane (Representative for Australian Ekalesias)

Not present: Rev. Tinirau Soatini (Representative for the Committee of Ministers)

Photo by Vaine Tutavake, Office Admin.